

Organizacion sostenedor di musiconan den preparacion

ORANJESTAD(AAN):— E comision cu dia 22 di November u.p. a organiza "Dia di musiconan" cu un Santo Sacrificio di Misa cu a ser bon atendi pa nos musiconan, a reuni den Kowloon Restaurant pa evalua e dia festivo cu a ser organiza pa prome biaha na Aruba, bao direccion di e iniciador " Sr.Hilary F.Tous-saint".

A yega na e conclusion cu lo mester celebra Dia di Musiconan anualmente y bini cu un programa bon prepara cu actividad bon organiza pa e Dia aki.

E comision cu a organiza e prome celebracion di Dia di Musiconan a haci esaki riba dia 22 di November ya cu e dia aki ta Dia di Santa Cecilia patrona di musiconan.

Mirando e exito cu tabata tin cu e celebracion e aña aki, e comision a dicidi di sigui organiza e dia, pero lo bay reuni cu Asoma riba e plannan cu a ser treci dilanti den e reunion.

Segun DIARIO tin entendi, intencion di e comision ta pa yega na un forma di organizacion y cu lazo di cooperacion cu Asoma y eventual otro organizacionnan riba

tereno musical.

E organo aki lo tuma riba nan mes pa tur aña organiza Dia di Musiconan, bini cu actividadnan na bienestar di musiconan, pa tur aña yuda un of mas musico financieramente, sea pa cumpra su instrumento, pa yuda graba disco cu su areglo, composicion of contribucion; tambe bini cu reconocimiento pa un of mas musico cu durante e aña den su genero a sobresali sin tene cuenta cu e ta ser considera un top musico of un principante; y asina por menciona ideanan cu a ser treci dilanti durante e reunion.

E comision menciona ta completamente neutral riba asunto di musica , musiconan y agrupacionnan musical y ta traha independiente y na interes di musiconan di organizacionnan musical riba nos isla, y tambe agrupacionnan sea cu nan ta tipico, conjunto, rockband, coro etc.

Intencion ta pa traha pa musiconan cu colaboracion y reconocimiento di musiconan.

Despues di e reunion algun persona a ser honra cu un plaquette pa e colaboracion cu nan a duna e aña aki na celebracion di Dia di Musiconan.

Sr.Elgin Juddan vice presidente di ASOMA a ser honra pa su bon colaboracion pero no tabata presente na e reunion .

Tambe Srta. Soraida Kerpens di e grupo "Luz di Caminda" a ricibi un plaquette pa e colaboracion cu su grupo y

coro a duna riba dia di e celebracion.

Inicador di e proyecto Sr.Hilary Toussaint a entrega plaquette tambe na Sr.Juby Naar, kende el a califica como e " Archivo Mental di artistanan" y kende a duna tur informacion necesario riba artistanan y esnan cu a fallece ultimo decadanan y colabora cu e comision.

Y tambe tabata tin plaquette pa Srta.Eireen Croes cu riba e Dia di Santa Cecilia a duna un promocion enorme via su programa radial di tur mainta y asina a contribui na e exito cu e dia tabata tin pa e prome biaha cu el a ser organiza.

Riba e foto adhunto por mira d.r.p.d. Sr. Rudy Janga di e Comision, Sr.Juby Naar y Srta. Soraida Kerpens cu nan plaquette, y tambe Sr.Hilary Toussaint y e miembro di comision Sr.Octavien Spanner.

